

Historia di Pentekostalismo

RAIS DI PENTEKOSTALISMO

Na fin di siglo 19, diferente siñansa a ser enfatisá entre kristiannan na Merka i Inglatera. E siñansanan aki a stimulá hopi kreyente pa anhelá pa un bida mas santu i deboto. Nota sinku di nan.

1. Iglesiasianan Metodista, siguiendo John Wesley (1703-1791) su siñansa, a siña ku tin un eksperensia despues di salbashon pa bo por yega na santifikashon kompleto. Ku e eksperensia aki, konosí komo e “segundo bendishon,” Spiritu Santu ta destruí e naturalesa pekaminoso pa medio di un obra divino di gracia.

2. Evangelista Charles G. Finney (1792-1875) i otro eskritornan Presbiteriano i Kongregashonal a enfatisá e importansia di un eksperensia ku ta transformá bo bida despues di kombertimentu. Nan no a komprendé esaki komo destrukshon di piká su deseo. Alkontrario nan a komprend’é komo un eksperensia ku ta empoderá e kreyente pa sirbi Señor. E eksperensia aki gradualmente a kuminsá ser yamá e boutismo den (òf di) Spiritu Santu. Asa Mahan (1800-1889), Phoebe W. Palmer (1807-1887), i John Inskip tambe tabata lídernan den e grupo aki. R. A. Torrey (1856-1928) tambe a siña ku e boutismo di Spiritu tabata un eksperensia nesario despues di salbashon pa ser empoderá pa sirbi Señor, no pa santifikashon.

Durante e era aki tambe tabatin hopi interes pa ku e persona i obra di Spiritu Santu. Hopi buki i artíkulo a ser skirbí tokante e risibimentu di poder dor di un eksperensia despues di kombertí.

3. J.N. Darby (1800-1882), C.I. Scofield (1843-1921), i hopi otro predikador tabatin siñansa premilenio i dispensionalista; enfatisando ku e rapto por sosodé na kualke momentu, i ku esaki lo ser siguí pa shete aña di tribulashon, e di dos binida di Kristo i milenio.

4. Un teologia nobo di sanashon divino a aparesé. Proponentenan di e siñansa aki a insistí ku e salbashon ku Kristo ta ofresé no solamente ta salba alma, ma tambe ta inkluí saniamentu pa e kurpa. A.B. Simpson (1843-1919), A.J. Gordon (1836-1895) i otronan, manera saniadónan John Alexander Dowie i Maria B. Woodworth-Etter a siña ku mester risibí kuramentu divino pa medio di fe.

5. Ademas hopi kreyente tabatin deseo ferviente pa poder i milagernan na un manera visto ser restorá manera tabata e kaso den iglesia di Tèstament Nobo. Hopi kristian a anhelá ku Spiritu Santu lo ser deramá ku poder pa kompletá historia.

Tambe ta bon pa nota ku tabatin kasonan di papiamentu na lenga staño durante siglo 19 na Merka i Inglatera. Ta difísil pa saka afó presis di unda e kreensia aki a sali, pero e tabata visto na fin di siglo 19. Por ehèmpel, el a sosodé durante e dekada di 1830 entre siguidónan di Edward Irving (yamá “Irvingitanan”), un presbiteriano di Londres. E tabata parti di e sirbishinan di e Shakers, guiá pa Mother Ann Lee. Serka mormonnan siguiendo José Smith, tabatin kasonan (probabelmente isolá) di papiamentu na lenga straño na New York, Missouri, i Utah. De todo kaso, papiamentu na lenga straño no tabata algu kompletamente deskonosí promé ku e inisio di pentekostalismo.

ORIGEN DI PENTEKOSTALISMO

Hopi historiadó ta konsiderá 1 yanüari 1901 komienso di e movimiento pentekostal. Pesei nos ke tuma tempu pa duna mas detaye di loke a sosodé e dia aki.

Charles Fox Parham (1873-1929) tabata un predikador di e movimiento Holiness (santidat). (Esaki tabata un esfuerso doktrinal pa preservá i promové e siñansa di John Wesley di santifikashon kompleto i perfekshon kristian. Nan a siña ku ta pusíbel pa un kreyente keda sin hasi piká dor di un “di dos bendishon” despues di salbashon.) Parham tambe tabata un eksponente di saniashon pa medio di fe. El a bisa ku el a wòrdu kurá di enfermedat di kurason hopi serio. El a deshasí di tur su remedi, kanselá su seguro, i a nenga tur forma di tratamentu médiko pa e restu di su bida.

Charles Parham a kuminsá un skol di Beibel, Bethel Bible College, na Topeka, Kansas, na òktobèr 1900. E skol a sera despues di ún aña eskolar. Parham a siña e studentenan pa studia tópikonan òf dok-

trinanan dor di buska palabranan den konkordansia. Su sistema no a tene kuenta mes ku e konteksto di un teksto (e regla mas importante di hermenutika). Nunka nan a studia henter un buki di Beibel.

Historiadó karismátiko, Vinson Synan, a skirbi,

“Pa vários aña, Parham tabata espesialmente interesá den diferente punto di bista pa ku e pregunta kon por risibí e boutismo di Spiritu Santu. Pa dékada 1890, mayoria hende den e movimiento Holiness tabata igualá e boutismo den Spiritu Santu ku e eksperensia di risibí santifikashon. ...Ma desde e dianan di John Wesley, kende a enfatisá e segundo bendishon promé, no tabatin akuerdo kiko tabata e evidencia di risibí e bendishon aki.

Presentando e problema aki na e studiantenan, Parham a splika ku hende di e movimiento Holiness a diferensia den nan siñansa tokante e evidencia di risibí e boutismo. “Algun,” el a duna por ehèmpel, “ta deklará ku nan a risibí e bendishon, demonstrá dor di gritamentu i bulamentu.” Na e mésun tempu, pa algun aña ya kaba Parham tabata impreshoná ku e pusibilidat ku glossolalia [papiando nan lenganan] por ser restorá komo un forma pa fasilidat siñamentu di un idioma pa mishoneronan no mester tuma tempu mas pa siña un idioma.

Parham mester tabata ousente for di su skol pa un wikent na fin di desèmber 1900. Segun Synan, el a duna su alumnonan un tarea durante su ousensia: “E donnan ta den Spiritu Santu, i ku e boutismo di Spiritu Santu, e donnan i tambe e grasianan lo mester ta manifestá. Awor, studiantenan, durante mi ousensia buska si tin evidensia di e boutismo pa no tin duda pa ku e tópiko aki.”

Ora Parham a regresá dia 30 di desèmber, nan a presentá nan konklushon unánimo. Nan tabata di akuerdo ku Beibel ta siña ku tin boutismo di Spiritu Santu despues di salbashon, i ku papiamentu na lenga straño ta e indikashon ku e pèrsona a risibí esaki. Segun Synan, nan a raportá, “maske diferente kos a sosodé ora e bendishon di Pentekostes a kai...e prueba irefutabel den kada kaso tabata, ku nan a papia na otro lenganan. En bista di e konklushon aki, tur estudiante a bai di akuerdo pa buska e restorashon di e poder di pentekostes ku e evidencia di papia na lenganan.”

Dia 1 di yanüari 1901 tabata poné komo e dia ku e studiantenan lo buska e boutismo. Nan a kuminsá hasi orashon mainta. Oranan despues, mas lat den dia, un estudiante di 30 aña di edat, señorita Agnes N. Ozman, a pidi Charles Parham pa pone man riba dje i hasi orashon “pa e risibí Spiritu Santu ku e señal apostóliko di papia na lenganan” (sitando Synan). Segun Agnes, “Ora el a hasi orashon i a pone mannan riba mi kabes, mi a kuminsa papia na lenganan, glorifikando Dios. Mi a papia na vários lenga, pasobra tabata evidente ora un [dialekto] a wòrdu papiá.” Despues otro estudiante tambe a papia na lenga straño. Nan a bisa ku ora nan a purba papia ingles, otro lenganan a sali.

Komo resultado di e eksperensia ei, Parham a kuminsá prediká ku segun buki di Echunan, lenganan straño a kompañá tur kaso di boutismo di Spiritu Santu (na un forma dirèkt òf indirèkt), i ku esei ta e patronchi pa kristiannan awendia. Desde e tempu aki papiamentu na lenga straño tabata konsiderá e indikashon supremo ku un persona a risibí e boutismo di Spiritu Santu.

Na aña 1905, Parham a habri un otro skol di Beibel na Houston, Texas. William J. Seymour tabata un di su alumnonan. Seymour a bira un evangelista afiliá ku “the Evening Light Saints,” un grupo ku tambe tabata afiliá ku iglesianan Holiness i “restorationist.” El a kuminsá tene sirbishinan den un iglesia African Methodist Episcopal bandoná, lokalísá na 312 Azusa Street, Los Angeles. Esaki a ser yamá Azusa Street Apostolic Faith Mission. Su siñansa a inisiá un “revivamentu” na aprel di 1906. Papiamentu na lenga straño tabata komún na e kapel aki, i tambe saniamentu. Hopi hende ku a bishitá Azusa Street Mission tambe tabatin e mésun eksperensia.

Tabata e sirbishinan aki di 1906 te ku 1909 ku ta rekonosé komo e inisio ofisial di pentekostalismo. Dor di e sirbishinan na Azusa Street Mission, pentekostalismo a kuminsá plama na Merka. Pues pentekostalismo tin su rais den e dos eventonan di añanan 1901 i 1906.

KRESEMENTU DI PENTEKOSTALISMO

Entre 1906 i 1911, diferente grupo di iglesianan Holiness a ser halá den e siñansa pentekostal dor ku lídernan di iglesianan Holiness a bishitá Azusa Street Mission pa investigá kiko ta pasando. Nan a regresá na nan iglesianan i a “pentekostalisá” nan. Entre nan tabatin G.B. Cashwell (North Carolina), C.

H. Mason (Tennessee), Glen Cook (California), A.G. Argue (Canada), i W.H. Durham (Chicago). Un año despues ku e sərbishinan a kuminsá na Azusa Street Mission, esakinan i hopi otro a plama e mensahe pentekostal rònt Merka.

Ma mayoria di e iglesianan Holiness a rechasá pentekostalismo. Komo resultado e promé denominashonnan pentekostal a kuminsá forma entre 1906 i 1908. E promé gruponan Holiness-Pentekostal a inkluí Pentecostal Holiness Church, Church of God in Christ, Church of God (Cleveland, Tennessee), Apostolic Faith (Portland, Oregon), United Holy Church, i e Pentecostal Free-Will Baptist Church.

E movimiento pentekostal a plama rápidamente pa otro parti di mundu despues di 1906. Un pastor Metodista norwedji, Thomas Ball Barratt, a hiba e mensahe i eksperensia pentekostal na Norwega, Suesia, i Inglatera. Un persona ku a kombertí serka Barratt, Lewis Pethrus, a dirigí e movimiento pentekostal na Suesia entre Boutistanan. Pentekostalismo a plama pa Inglatera dor di un pastor Anglikano, Alexander A. Boddy. Jonathan Paul, un líder Holiness, a introdusí esaki na Alemania. Imigrantenan italiano na Merka a hiba pentekostalismo bèk na Italia.

Pentekostalismo a yega Chile na año 1909 bou liderato di un mishonero merikano Metodista, Willis C. Hoover. Komo resultado di un kiebro ku a bin den e iglesianan Metodista na Chile, e organisashon Iglesia Metodista Pentekostal a originá i a krese rápidamente. Awendia pentekostalismo ta forma 80% di e poblashon kristian na Chile.

Dos merikano ku a originá for di suisia a introdusí pentekostalismo na Brazil na año 1910, Daniel Berg i Gunnar Vingren. Nan a kuminsá sərbishinan pentekostal den un iglesia Boutista na Belém, Pará. Poko tempu despues, un kiebro a tuma lugá, ku e resultado ku un iglesia pentekostal a forma. Awendia ta kalkulá ku 2/3 parti di e kristiannan na Brazil ta pentekostal.

Pentekostalismo a ser introdusí na China, Afrika, i hopi otro pais na año 1910. E merikano-ruso, Ivan Voronaev a hiba pentekostalismo na Odessa, Rusia na año 1920 i a funda mas ku 350 kongregashon pentekostal na Rusia, Polonia, i Bulgaria promé ku el a ser enkarselá pa polis sovietiko na 1929.

Na año 1914, kreyentenan afiliá ku Christian and Missionary Alliance na Arkansas na Merka a forma loke lo bira e denominashon pentekostal mas grandí na mundu, Asemblea di Dios. Dos año despues tabatin un kiebro den e denominashon nobo aki. Motibu di esaki tabata pasobra un movimiento a lamta den nan ku a rechasá e doktrina di Trinidad i a siña ku Hesus tabata tantu Tata, komo Yu, komo Spiritu Santu i ku mester batisá den nòmber di Hesus so, i ku e boutismo tabata válido solamente si e tabata kompañá ku papiamentu na lenga straño. (P'esei e movimiento aki a haña e nòmber "Jesus only" [Hesus so].) Esnan ku a kita for di Asemblea di Dios na año 1916 a forma Pentecostal Assemblies of the World i tambe United Pentecostal Church.

Mayoria di e gruponan pentekostal ku a originá despues di 1914 a sigui e modèl di Asemblea di Dios. Esakinan ta inkluí Petecostal Church of God i Open Bible Standard Church. Aimee Semple McPherson a kibra ku Asemblea di Dios i na 1927 a funda International Church of the Foursquare Gospel

Durante historia, otro kiebro a tuma lugá basá riba puntonan doktrinal i klèsh entre personanan. Komo resultado, mas iglesia i denominashon pentekostal a lamta. Dos di esakinan tabata Iglesia di Dios di Profesia i Congregational Holiness Church.

Pues, tin hopi iglesia i denominashon awendia ku ta karga e nòmber i/òf ta sigui e siñansa pentekostal. Na Merka tin mas òf ménos 300 denominashon ku afiliashon pentekostal. Ma e dosnan mas grandí ta Church of God in Christ i Asemblea di Dios.

Denominashonnan pentekostal a kuminsá tin mas kontakto ku otro na año 1947, ku e promé Konferensia Pentekostal Mundial na Zurich, Suisa. E konferensianan aki ta tuma lugá kada tres año.

David B. Barrett su buki *World Christian Encyclopedia* (1987?) a bisa ku tin mas ku 100 mion pentekostal rònt mundu. E tres iglesianan kristian mas grandí na mundu ta iglesianan pentekostal. Esun mas grandí ta Full Gospel Central Church na Seoul, Korea ku pastor Paul Yonggi Cho (ku algun año pasá a kambia su nòmber pa David Cho). Mas ku 500.000 hende ta bishitá e iglesia aki tur siman. Nan tin 370.000 miembro. Un enkuesta na Merka na año 1979 a revelá ku 19% di tur merikano adulto (esta 29 mion persona) a konsiderá nan mes pentekostal. Sinku mion di esakinan a deklará ku nan a yega di papia na lenga straño.

ORIGEN DI E MOVIMIENTO KARISMÁTIKO

En general historiadónan ta di akuerdo ku e movimiento karismátiko a originá ku Dennis Bennett na año 1960. Bennett, na año 1959, tabata pastor di St. Mark's Episcopal Church di Van Nuys, California, a "risibí e don" i a papia na lenga straño. E pastor a prediká esaki i mas miembronan di su kongregashon a eksperensia e mésun fenómeno. Pa motibu di e kontroversia ku esaki a okashoná, Bennett a ser obligá pa bandoná su iglesia. Ma en kontraste di loke a sosodé den pasado, e no a bandoná e denominashon Episcopal i djòin un grupo Pentekostal. El a keda den e denominashon. Bennett a ser invitá pa bira pastor di un iglesia Episcopal na Seattle, Washington i ei el a infektá su kongregashon ku e siñansa pentekostal. E iglesia a krese rápidamente komo resultado. Jean Stone, un miembro di Bennett su iglesia, a plama e siñansa aki dor di su revista *Trinity* for di 1961 te 1966.

Pues e movimiento karismátiko ta distinto for di e pentekostalismo den e sintido ku esnan ku ta karismátiko ta keda den nan mes iglesia, denominashon, òf religion i ta agregá siñansa i práktikanan pentekostal, na lugá di bandoná nan iglesia i uni ku un iglesia pentekostal. No tabata te año 1973 ku e palabra "karismátiko" a kuminsá ser usá pa hasi e distinshon aki. Pentekostalnan "klásiko" (esta, iglesianan i denominashonnan pentekostal) no a apoyá e movimiento karismátiko na su komienso.

Hopi otro denominashon a kuminsá inkorporá e eksperensia pentekostal tantu na Merka komo rònt mundu. Algun di e lídernan bon konosí den e movimiento karismátiko tabata Brick Bradford i James Brown (denominashon Presbiteriano); John Osteen i Howard Irvin (denominashon Boutista); Gerald Derstine i Obispo Nelson Litwiler (denominashon Menonita); Larry Christenson (denominashon Lutheranu); i Ross Whetstone (denominashon United Methodist).

E movimiento karismátiko a drenta un fase nobo na año 1966. Vários katóliko na un universidat katóliko, Duquesne University na Pittsburgh, Pennsylvania, tabata hasi orashon pidiendo pa un revivamentu den nan bida spiritual. Nan a lesa e buki di Nicky Cruz, *The Cross and the Switchblade* i a bishitá un estudio di Beibel karismátiko dia 13 di yanüari 1967. Kuater di nan a ser batisá ku Spiritu Santu i a kuminsá kompartí e eksperensia aki ku nan amigunan.

Na luna di febrüari di e mésun año tabatin un konferensia di un wikent pa studiantenan i dosentenan di e universidat. Dos profesor di teologia di Dusquesne University, Ralph Keifer i Bill Story a dirigí esaki, i hopi den e grupo tabatin e mésun eksperensia kompañá ku papiamentu na lenga straño. Keifer a hiba e mensahe na un otro universidat katóliko, Notre Dame University, dia 5 di mart 1967, ku e mésun resultado. Trinta otro katóliko tabatin e eksperensia pentekostal riba dia di pasku di resurekshon. El a plama rápidamente pa otro universidatnan katóliko: Universidat di Michigan, University of Iowa, i College of the Holy Cross na Worcester, Massachusetts.

Pa yüli di 1968 ya kaba mas ku 5000 katóliko a "risibí Spiritu Santu" di e forma pentekostal. Pa año 1973, mas ku 30.000 katóliko pentekostal a reuní na universidat di Notre Dame pa un konferensia. Ora mas ku 10.000 katóliko karismátiko a yena e basílika di San Pedro na Roma pa un konfrensia internashonal di renobashon karismátiko na año 1975, Papa Pablo VI a aprobá. Pa año 1980, e movimiento karismátiko katóliko a plama pa mas ku shen pais. Sífranan ta vária pero algun ta kalkulá ku aktualmente tin 50 - 65 mion katóliko karismátiko na mundu.

E líder karismátiko prominente entre katólikonan ta kardinal Joseph Leon Suenens di Bélgika. El a ser apuntá pa tantu papanan Pablo VI komo Juan Pablo II komo nan konsehero relashoná ku asuntonan karismátiko.

Katólikonan karismátiko ta enfatisá orashon, studiamentu di Beibel, evangelismo pèrsonal, donnan di Spiritu, i un bida den Spiritu. Ma ta notabel ku e eksperensia karismátiko den iglesianan katóliko tambe ta resultá den mas deboshon na nan misa i venerashon di e Brigen Maria.

PENTEKOSTALNAN I KARISMÁTIKONAN AWENDIA

E influencia karismátiko a yega asina leu ku sektanan karismátiko ta lamta na Asia ku ta meskla siñansa di budismo, taoismo, confucianismo òf otro siñansa falsu huntu ku siñansa karismátiko. Segun

Asiaweek (6 òktober 1989), un grupo ekstremo karismátiko na parti sentral di Taiwan, yamá Iglesia Tèstamènt Nobo. Dirigí pa nan profeta Elias Hong, nan a rosa un sitio riba e serunan Shuang Lien den selva i a yam'é Seru Sion. Nan ta antisipá ku Señor lo bin pronto. I na tur parti di Asia nan influensia ta krese mientras mas hende ta kombertí na nan sekta. Ta obvio ku doktrina no ta hunga un ròl importante den e movimiento karismátiko.

Pentekostalismo di antes tabatin un énfasis fuerte pa e kristian separá for di piká i kosnan mundano. Te awendia hopi iglesia pentekostal ta enfatisá esaki. En kontraste, karismátikonan en general ta hasi un yamada pa tur esnan ku a yega di tin e “eksperensia” pa uni huntu i stima otro apesar di nan diferensianan doktrinal òf nan sistema di bida.

E mentalidat aki ta hasiendo un impakto riba pentekostalismo awendia. Hopi pentekostal ta aseptá e mentalidat karismátiko i ta komprometé nan normanan. Maske algun iglesia ta bandoná nan denominashonnan pentekostal pa motibu di esaki, tòg hopi denominashon pentekostal ta sostené e movimiento karismátiko.

- skirbí pa Dean Ressler, 1995

Literatura Konsultá

Cairns, Earle E., *Christianity Through the Centuries* (Grand Rapids: Academic Books, Zondervan Publishing House, 1981), p. 457-458.

Elwell, Walter A., editor, *Evangelical Dictionary of Theology* (Grand Rapids: Baker Book House), 1984, p. 835-839 “Pentecostalism”

Ferguson, Sinclair B., Wright, David F., Packer, J. I., editors, *New Dictionary of Theology* (Downers Grove, IL: InterVarsity Press), 1988, p. 502-505.

MacArthur, John F. Jr., *Charismatic Chaos*, (Grand Rapids: Academic and Professional Book, Zondervan Publishing House, 1992), p. 32-35, 294-295.

Sidwell, Mark, “Pentecostalism and the Charismatic Movement,” *Faith for the Family*, February, 1985, p. 13-14.

Synan, Vinson, “The Touch Felt Around the World” *Charisma* (yanüari 1991), p. 80-83, sitá pa John MacArthur, *Charismatic Chaos*, (Grand Rapids: Academic and Professional Book, Zondervan publishing House, 1992), p. 32-35.

Wacker, Grant, “America’s Pentecostals, Who Are They?” *Christianity Today*, October 16, 1987, p. 16-21.